

Erich Bolinius
www.erichbolinius.de

Bericht über den BSV Kickers Emden

Sendung „Flutlicht“ auf Radio Ostfriesland

Donnerstag, 20.3.2014 18.05 Uhr auf 94.0 bzw. 87,7)

Moin, leev Toehörers,
lesd Week hett Kickers Emden ´n bietje unglückelk in Leer tegen Germania mit 0:1 verloren. Kickers spölte wall beter, man de Leeraner Spölers wassen bissiger, branneger. Dor wurr ok maal van achtern grätscht of bi ´n goed Mögelkeid för Kickers, de Spöler einfach fasthollen. De Kickersspölers, un dat see Kickers Trainer **Markus Olbrys** na dat Spöl, harren an hör witte Büxen keen swart Stee. He meente dormit, se wassen neet aggressiv genug west. Se harren mehr bieten muss.
Dat sullte, ja muss tegen Bad Rothenfelde anners worden, see he vör dat Spöl lesd Sönndag.

Maal sehn, of de Spölers dat ok so utföhren, hebb ik docht, as ik mi um Klock dree up de Tribüne sett hebb, um mi toesamen mit goed 280 Toekiekers dat Spöl van Kickers Emden tegen VFL Bad Rothenfelde antoekieken.

Van dit Spöl sall ik in disse Sendung neet so völ vertellen. De Moderatoren meenen, dat in de Pressekonferenz, de ja immer hier ok sendt word, alls toe dat Spöl seggt word. Ik will mi doran hollen, bi Heimspölen also keen Spölbericht toe geven. Aber ehrelk, hebben se leev Toehörers all maal in de Pressekonferenz hört, well in weffe Menüte ´n Tor skoten of verhinnert hett. Ik neet.

Aber egaal, ik segg hier toe dat Spöl blot sovöl. De Spölers van Kickers Emden hebben sük düchtig in dat Spöl rinhalen und verdeent mit 1:0 dör ´n Tor van **Azis Timur** wunnen. De Spölers van Rothenfelde hebben mennigmaal heel unfair spölt. Twee Spölers sünd, na mien Menen aber völ toe laat, mit ´n geel-rood Kaart van d´ Platz stürt worden.

De Kickerstrainer hett sük neet blot na mien Gefühl völ toe luud un mit neet so moi Woorden bi de Schiri beschwert un is, so seh ik dat, toerecht up de Tribüne stürt worden. Tegen mi. satten stückofwat jung Foetballers van Kickers Emden, schätze so um de tein Jahr, wat hebben de wall för ´n Indruck van hör Cheftrainer kregen?

Dat sük na dat Spöl Trainer Markus Olbrys un Torwarttrainer **Manfred Wehe** blied in de Arms laggen, dat kann ik goed verstahn. Gung dat in disse Spöl doch um heel völ.

Kickers Emden steiht nu in de Landesliga Weser-Eems mit 28 Punkten un 20 Spölen up de 11. Platz. Van de Ofstiegsplatzen ist man wall 5 Punkten weg, aber seker föhlen sullte man sük neet.

De komende Wekenenn geiht dat na Holthausen-Biene, de mit 42 Punkten up de darte Tabellenplatz steiht. Dat word seker ´n heel stur Spöl för de Jungs van Kickers Emden. Man bang maken gifft neet.

Nu noch toe de anner oostfreeske Mannskuppen. Pesem (Pewsum) hett mit de lesd Upgeboot tegen de 2. Mannskupp van VFB Oldenburg up egen Platz mit 0:3 verloren un stahn up de darte lesd Platz. Sücht düster ut för Pesem.

Germania Leer hett heel unglückelk in Oldenburg tegen de VFL mit 0:1 verloren. Trainer **Pastorek** was aber mit sien Jungs toefree. „Wenn wi so wieder spölen“, meente he, „dann haalen wi uns de nödige Punkte un stiegen neet of.“ Man noch steiht Germania mit 21 Punkten up de 15. Platz.

TV Bunn (Bunde) spölt van Spöldag toe Spöldag beter. Dit maal wunn man tegen de VFL Oythe mit 2:1. Dat liggt ok wall an de neei Trainers. Aber man steiht mit blot 11 Punkten

immer noch up de lesd Platz. Ik löv neet doran, dat Bunn de Ofstieg noch vermieden kann.
Aber, in Foetball is ja alls mögelk.

So, nu toe Schluss, so as alltied 'n Foetballwitz of 'n Foetballsprök van 'n Prominente.

Bastian Schweinsteiger meente over 'n neei Trainer un de Ingewöhnungstied:
„Wenn man 'n neei Fründin hett, dann klappt ok neet immer alls glik perfekt.“

So, leev Toehörers van Radio Oostfreesland,
ik hoop, Joe hett dat Plattdüütsk gefallen, denn mien Motto heet ja alltied,
plattdüütsk dürt - nettso as Kickers Emden – neet unnergahn.

Bit anner Maal

Joe

Erich Bolinius ut Emden-Petjem.

.